

黃氏逸書考

子史鈎沉

逸書考

干寶晉紀

甘泉黃奭學

高祖宣帝

帝問宣王度淵將何計以待君宣王曰淵棄城預走上計也據遼水拒大軍其次也坐守襄平此爲成禽耳帝曰然則三者何出對曰唯明智審量彼我乃預有所割棄此旣非淵所及又謂今往縣遠不能持久必先據遼水然後守也帝曰往還幾日對曰往日攻百

日還百日以六十日爲休息如此一年足矣
三國魏志明帝紀注

吳將全琮寇芍陂朱然孫倫五萬人圍樊城
諸葛瑾步騭寇柵中琮已破走而樊圍急宣
王曰柵中民夷十萬隔在水南流離無主樊
城被攻歷月不解此危事也請自討之議者
咸言賊遠圍樊城不可拔挫於堅城之下有
自破之勢宜長策以御之宣王曰軍志有之
將能而御之此謂糜軍不能而任之此爲覆

軍今疆場騷動民心疑惑是社稷之大憂也
六月督諸軍南征車駕送津陽城門外宣王
以南方暑溼不宜持久使輕騎挑之然不敢
動於是乃令諸軍休息洗沐簡精銳募先登
申號令示必攻之勢乃夜遁追至三州口大
殺獲

魏志三少帝紀注

孝惠帝

武帝使侍中荀顗和嶠俱至東宮觀察太子
顗還稱太子德識進茂而嶠云聖質如初

魏志

荀彧傳注

曹爽

爽留車駕宿伊水南伐木爲鹿角發屯田兵數千人以爲衛

魏志曹爽傳注

桓範出赴爽宣王謂蔣濟曰智囊往矣濟曰範則智矣驚馬戀棧豆爽必不能用也

魏志同上

藝文九十三 御覽八百九十五引棧豆作芻豆又四百三十二引至智囊往矣

魯芝 楊綜

爽旣誅宣王卽擢芝爲并州刺史以綜爲安

東叅軍

魏志曹爽傳注

王淩

淩到項見賈逵祠在水側淩呼曰賈梁道王
淩固忠於魏之社稷者唯爾有神知之其年
太傅有疾夢淩逵爲厲甚惡之遂薨

魏志王淩傳注

孟達

達初入新城登白雲臺嘆曰劉封申耽據金
城千里而失之乎

魏志明帝紀注

諸葛誕

數百人拱手爲列每斬一人輒降之竟不變
至盡時人比之田橫吳將于銓曰大丈夫受
命以兵救人旣不能克又束手於敵吾弗取
也乃免冑冒陣而死

魏志諸葛誕傳注

初壽春每歲兩潦常淹城邑故文王之築園
也誕笑之曰是固不攻而自敗也及大軍之
攻亢旱踰月城旣陷是日大雨圍壘皆毀誕
子覲字仲思吳平還晉覲子恢字道明位至
尚書令追贈左光祿大夫開府

魏志同上

馬隆

兖州武甯東不馬隆託爲愚家客以私財更
殯葬行服三年種植松柏一州之士媿之

魏志

王爰傳注

愚謂令狐愚王凌外甥

賈充

成濟問賈充曰事急矣若之何充曰公畜養
汝等爲今日之事也夫何疑濟曰然乃抽戈
犯蹕

魏志三少帝紀注

劉陶

卅邱儉之起也大將軍以問陶陶答依違大將軍怒曰卿平生與吾論天下事至於今日而更不盡乎乃出爲平原太守又追殺之

魏志

劉陞傳注

蔣濟

蔣濟以曹真之勲力不宜絕嗣故以熙爲後濟又病其言之失信於爽發病卒

魏志曹爽傳注

呂安

呂安兄巽善於鍾會巽爲相國掾俱有寵於

司馬文王故遂抵安罪

魏志王粲傳注

嵇康

正元二年司馬文王反自樂嘉殺嵇康呂安

魏志王粲傳注

陳咸

曾字穎考正元中爲司隸校尉時母邱儉孫女適劉氏以孕繫廷尉女母荀爲武衛將軍荀顗所表活旣免辭詣廷尉乞爲宮婢以贖女命曾使主簿陳咸爲議議曰大魏承秦漢

之弊未及革制所以追戮已出之女誠欲殄醜類之族也若已產育則成他家之母於法則不足懲奸亂之源於情則傷孝子之思男不御罪於他族而女獨嬰戮於二門非所以哀矜女弱均法制之大分也臣以爲在室之女可從父母之刑旣醮之婦使從夫家之戮朝廷從之乃定律令

魏志何夔傳注 曾謂何曾

姜維

曾謂維曰來何遲也維正色流涕曰今日見

此爲速矣會甚奇之

蜀志姜維傳注

姜維爲蜀相國亡主辱弗之死而死於鍾會之亂惜哉非死之難處死之難也是以古之烈士見危授命投節如歸非不愛死也固知命之不長而不得其死也

蜀志同上引干寶曰此當是姜維論

諸葛瞻

瞻雖智不足以扶危勇不足以拒敵而能外不負國內不改父之志忠孝存焉

蜀志諸葛瞻傳注引

干寶曰案當是諸葛瞻論

薛瑩

武帝從容問瑩曰孫皓之所以亡者何也瑩對曰歸命侯臣皓之君吳也昵近小人刑罰妄加大臣大將無所親信人人憂恐各不自保危亡之釁實由於此帝遂問吳士存亡者之賢愚瑩各以狀對

吳志薛綜傳注

趙達

魏文帝之在廣陵吳人大駭乃臨江爲疑城自石頭至於江乘車以木楨衣以葦席加采

飾焉一夕而成魏曰江西望甚憚之遂退軍
權令趙達算之曰曹丕走矣雖然吳衰庚子
歲權曰幾何達屈指而計之曰五十八年權
曰今日之憂不暇及遠此子孫事也吳志孫
權傳注
御覽一百九十二引至一夕而成車以木植
作以木爲板

陟璆

陟璆奉使如魏入境而問諱入國而問俗壽
春將王布示之馬射而問之曰吳之君子亦
能斯乎陟曰此軍人騎士肄業所及士大夫

君子未有爲之者矣布大慙旣至魏帝見之
使僨問曰來時吳王何如陟對曰來時皇帝
臨軒百寮陪位御膳無恙晉文王饗之百寮
畢曾使僨者告曰某者安樂公也某者匈奴
單于也陟曰西王失土爲君王所禮位同三
代莫不感義匈奴邊塞難羈之國君王懷之
親在坐席此誠威恩遠著又問吳之戍備幾
何對曰自西陵以至江都五千七百里又問
曰道里甚遠難爲堅固對曰疆界雖遠而其

險要必爭之地不過數四猶人雖有八尺之
軀靡不受患其護風寒亦數處耳文王善之
厚爲之禮

吳志孫皓傳注

書鈔四寸引至

岑昏

皓殿中親近數百人叩頭謂皓曰北軍日近
而兵不舉刃陛下將如之何皓曰何故對曰
坐岑昏皓獨言若爾便當以奴謝百姓衆因
曰唯遂並起收昏皓駱驛追止已屠之也

孫皓傳注

吳志

張悌

吳丞相軍師張悌護軍孫震丹陽太守沈瑩
帥衆三萬濟江圍成陽都尉於楊荷橋衆才
七千閉柵自守舉白接

接字疑

告降吳副軍師

諸葛靚欲屠之悌曰強敵在前不宜先事其
小且殺降不祥靚曰此等以救兵未至而力
少故且僞降以緩我非來伏也因其無戰心
而盡坑之可以成三軍之氣若舍之而前必
爲後患悌不從撫之而進與討吳護軍張喻

揚州刺史周俊成陣相對沈瑩領丹陽銳卒
刀楯五千號曰青巾兵前後屢陷堅陣於是
以馳淮南軍三衝不動退引亂薛勝蔣班因
其亂而乘之吳軍以次土崩將帥不能止張
喬又出其後大敗吳軍於板橋獲梯震瑩等
吳志孫皓傳注 御覽三百五十七引吳軍
帥張梯帥衆一二萬濟江與討吳護軍張翰
至屢陷堅陣周俊作周浚

尙廣

王濬治船於蜀吾彥取其流柿以呈孫皓曰

晉必有攻吳之計宜增建平兵建平不下終不敢渡江皓弗從陸抗之克步闡也皓意張大乃使尙廣筮并天下對曰庚子歲青蓋當入洛陽故皓不修其政而恒有窺土國之志是歲也實在庚子

吳志孫皓傳注

孫秀

此非從趙王倫之孫秀

秀在晉朝初聞皓降羣臣畢賀秀稱疾不與南向流涕曰昔討逆以一校尉創業今後主舉江南而棄之宗廟山陵於此爲墟悠悠蒼

天此何人哉朝廷美之

吳志孫匡傳注上俱三國志注

己

太祖文帝

高貴鄉公之殺司馬文王召朝臣謀其故太
常陳泰不至使其舅荀顗召之告以可不泰
曰世之論者以泰方於舅今舅不如泰也子
弟內外咸共逼之垂涕而入文王待之曲室
謂曰玄伯卿何以處我對曰可誅賈充以謝
天下文王曰爲吾更思其次泰曰唯有進於
此不知其次文王乃止

世說

新語方正篇注三國魏志陳泰傳

注引告以可否上有顗至二字諒賈充上無
可字唯有上有泰言二字乃止作不更言
文選袁彥伯三國名臣序讚注引之殺作之
弑其故太常陳泰下即接垂涕而入無而字
諒賈充上無可字唯有上有泰言二字乃止
作乃久不言下有為侍中轉左僕射薨入字
御覽四百二十八引之殺作薨下作太祖
會朝臣而謀其故作其日荀顗召之下即接
垂涕而入誅賈充上無可字更思其次上作
不可為泰曰下作但見其進末句作太祖乃
不復置

孝惠帝

皇太子有醇古之風美於信受侍中和嶠數
言於上曰季世多僞而太子尚信非四海之

主憂太子不了家事願追思文武之阼上既
重長適又懷齊王朋黨之論弗入也後上謂
嶠曰太子近日朝吾謂差進卿可與荀侍中
共往言及顗奉詔還對曰太子明識弘新有
如明詔問嶠嶠對曰聖質如初上默然

世說
方正
篇注

夏侯玄

初豐之謀也使告玄玄荅曰宜詳之不以聞
也故及於難

世說方正篇注

王經

經正直不忠於我故誅之

世說棲逸篇注

荀勗

荀勗始造正德大象之舞以魏杜夔所制律呂較大樂本音不和後漢至魏尺長於古四分有餘而夔據之是以失韻乃依周禮積粟以起度量以度古器符於本銘遂以爲式用之郊廟

世說術解篇注

呂安

初安之交康也其相思則率爾命駕

世說簡傲篇注

安嘗從康或遇其行康兄喜拭席而待弗之
顧獨坐車中康母就設酒食求康兒共語戲
良久則去其輕貴如此

世說同上

阮籍

何曾嘗謂阮籍曰卿恣情任性敗俗之人也
今忠賢執政綜核名實若卿之徒何可長也
復言之於太祖籍飲噉不輟故魏晉之間有
被髮夷倣之事背死忘生之人反謂行禮者

籍爲之也

世說任誕篇注

陸抗

初陸抗誅步闡百口皆盡有識尤之及機雲

見害三族無遺

世說尤悔篇注

己上俱世說注

中興之瑞

中牟縣故魏任城王臺下池中有漢時鐵椎
長六尺入地三尺頭西南指不可動至月朔
至正以爲晉氏中興之瑞

水經渠水注

晉紀總論

史臣曰

藝文無史臣曰三字

昔高祖宣皇帝以雄才碩

量應運而仕

藝文下即接至於百姓與能

值魏太祖創基

之初籌畫軍國嘉謀屢中遂服輿軫驅馳三

世性深阻

初學記作深隩

有如城府而能寬綽以容

納任數以御物而知人善采拔故賢愚咸懷

小大畢力爾乃取鄧艾於農隙

晉書隙作瑣

引州

泰於行役委以文武各善其事故能西禽孟

達東舉公孫淵內夷曹爽外襲王凌神畧獨

斷征伐四克維御羣后大權在己屢拒諸葛

亮節制之兵而東支吳人輔車之勢軍旅屢

動邊鄙無虧

晉書無屢拒已下至無虧

於是百姓與能大

象始構矣世宗承基太祖繼業玄豐亂內欽

誕寇外潛謀雖密而在必兆淮浦再擾而許

洛不震咸黜異圖用融前烈然後推轂鍾鄧

長驅庸蜀三關電掃劉禪入臣天符人事於

是信矣

藝文無玄豐亂內已下至信矣

始當非常之禮終受

備物之錫

藝文下即接至於世祖

名器崇於周公權制

嚴於伊尹

晉書無名器至伊尹十二字

至於世祖遂享皇

極正位居體羣書治要錄晉書自世祖正位居體起重言慎法

晉書無正位仁以厚下治要厚作原誤儉以足用和

而不弛治要無儉以二句寬而能斷故民詠惟新四

海悅勸矣悅勸治要作歡悅藝文無重言已下至悅勸矣聿修祖宗

之志思輯戰國之苦腹心不同公卿異議治要

無思輯已下十四字而獨納羊祜之策治要無而字以從善

為衆故藝文無以從六字至於咸寧之末遂排羣議

晉書無以從善至羣議十六字而仗王杜之決晉書無汎舟而字

三峽介馬桂陽晉書無汎舟二句治要無役以從善至桂楊三十字

不二時江湘來同

治要湘作湖藝文同

夷吳蜀之壘垣

通二方之險塞

晉書無夷吳蜀二句藝文同

掩唐虞之舊

域班正朔於八荒太康之中

晉書無太康四字

天下

書同文車同軌牛馬被野

治要無太康至餘被野十六字

糧棲畝

治要棲作委

行旅草舍

治要無行旅四字

外間不

通

治要問作闕藝文通作開

民相遇者如親其匱乏者取

資於道路

晉書無行旅已下至道路

故於時有天下無窮

人之諺

藝文無民相遇已下至之諺

雖太平未洽亦足以

明吏奉其法民樂其生百代之一時矣

晉書無百

代之一時五字武皇既崩山陵未乾治要山陵作陵土楊駿

被誅治要楊駿上有而字母后廢黜朝士舊臣夷滅者

數十族晉書無朝士至十族十字尋以二公楚王之變治要

無尋以八字宗子無維城之助而閼伯實沈之卻

治要卻作隙歲構晉書無而師尹無具瞻之貴而

顛墜戮辱之禍日有晉書無而至乃易天子

以太上之號而有免官之謠治要無至乃至之謠十六字

民不見德唯亂是聞朝為伊周夕為桀跖善

惡陷於成敗毀譽脅於勢利晉書勢作世於是輕

薄干紀之士役姦智以投之如夜蟲之赴火

治要無朝為伊周至赴火四十字晉書無於是至赴火二十字內外混淆庶

官失才治要無庶名實反錯天網解紐治要

網四國政迭移於亂人禁兵外散於四方方

岳無鈞石之鎮關門無結草之固李辰石冰

傾之於荆揚劉淵晉書劉淵作元海王彌撓之於青

冀冀文無武皇既二十餘年而河洛為墟晉書

無二十至戎羯稱制二帝失尊山陵無所晉書

無山陵何哉樹立失權託付非才四維不張

四字

而苟且之政多也夫作法於治其弊猶亂作

法於亂誰能救之故

治要無故字

于時天下非暫

弱也軍旅非無素也彼劉淵者

晉書無故字時至素也十

五字劉淵作元海

離石之將兵都尉王彌者青州之

散吏也蓋皆弓馬之士驅走之人凡庸之才

晉書無凡庸四字

非有吳先主諸葛孔明之能也新

起之寇烏合之衆非吳蜀之敵也脫未爲兵

裂裳爲旗

治要裳作衣

非戰國之器也自下逆上

非鄰國之勢也然而成敗異效

晉書無成敗四字擾

天下如驅羣羊舉二都如拾遺芥

治要脫芥字

將

相連頭受戮

晉書作連頭以治要頭作頸

乞為奴僕而猶

不獲

晉書無乞為至不獲八字

后嬪妃主虜辱於戎卒豈

不哀哉

藝文無夫作法已下至哀哉

夫天下大器也羣生

重畜也愛惡相攻利害相奪其勢常也

治要無常

也二

若積水於防燎火於原未嘗暫靜也

藝文

無羣生已下至靜也

器大者不可以小道治勢動

治要動作

重藝文同

者不可以爭競據古先哲王知其然也

是以并其大患而不有其功

晉書無而不五字

禦其

大災而不尸其利

晉書無而不五字藝文百下即接是以感而應之

姓皆知上德之生已而不謂浚已以生也

治要

古先哲王下作知利百姓下即接是以云云

是以感而應之悅而

歸之如晨風之鬱北林龍魚之趣淵澤也順

乎天而享其運應乎人而和其義

晉書無順乎天至其

義十四字治要同藝文同

然後設禮文以治之

藝文治作理下即接

故衆悅其教而安其俗

斷刑罰以威之謹好惡以示之

審禍福以喻之求明察以官之篤慈愛以固

之

晉書治之作理之篤作尊

故衆知向方

治要無衆知四字

皆樂

其生而哀其死悅其教而安其俗君子勤禮

小人盡力廉耻篤於家閭邪僻銷於胷懷故

其民有見危以授命而不求生以害義藝文無故

其民已下又況可治要無奮臂大呼聚之以

干紀作亂之事乎藝文下即接加之基廣則

難傾根深則難拔理節則不亂膠結則不遷

是以昔之有天下者治要者下所以長久也

夫豈無僻土賴道德典刑以維持之也故延

陵季子聽樂以知諸侯存亡之數短長之期

者蓋民情風教國家安危之本也

晉書無故延陵已下

至本也

昔周之興也后稷生於姜嫄而天命昭

顯文武之功起於后稷故其詩曰思文后稷

光配彼天又曰立我蒸民莫匪爾極又曰實

穎實栗卽有邵家室

晉書無其詩曰已下至家室

至於公

劉遭狄人之亂去豳之邵身服厥勞故其詩

曰乃裹餼糧于橐于囊陟則在巘復降在原

以處其民

晉書無故其詩曰已下至其民

以至於太王

晉書無以

字

爲戎翟所逼而不忍百姓之命杖策而去

之故其詩曰來朝走馬帥西水滸至於岐下

周民從而思曰仁人不可失也

晉書無故其詩曰已下至

失也故從之如歸市居之

晉書無居之二字

一年成邑

二年成都三年五倍其初每勞來而安集之

故其詩曰乃慰乃止乃左乃右乃疆乃理乃

宣乃畝

晉書無每勞來已下至乃畝

以至於王季

晉書無以字

能貊其德音故其詩曰克明克類克長克君

載錫之光

晉書無故其詩曰已下至之光

至於文王備修舊

德

晉書無備修四字

而惟新其命故其詩曰惟此文

王小心翼翼昭事上帝聿懷多福

晉書無故其詩曰已

下三多福

由此觀之周家世積忠厚仁及草木內

睦九族外尊事黃耆考養老乞言以成其福祿

者也

晉書內睦作內隆無養老乞言四字

而其後妃躬行四教

尊敬師傅服澣濯之衣修煩辱之事化天下

以婦道故其詩曰刑于寡妻至于兄弟以御

于家邦

晉書婦道上有成字無故其詩曰已下至家邦

是以漢濱之

女守潔白之志中林之士有純一之德故曰

文武自天保以上治內采薇以下治外

晉書無故

日已下至治外始於憂勤終於逸樂於是天下三分

有二猶以服事殷諸侯不期而會者八百猶

曰天命未至晉書無於是已以三聖之智伐

獨夫之紂猶正其名教曰逆取順守保大定

功安名和衆猶著大武之容曰未盡善也晉書

無保大已及周公遭變陳后稷先公風化之

所由致王業之艱難者則皆農夫女工衣食

之事也故自后稷之始基靜民十五王而文

始平之十六王而武始居之十八王而康克

安之故其積基樹本經緯禮俗節理人情恤

隱民事如此之纏綿也爰及上代雖文質異

時功業不同及其安民立政者其揆一也晉書

無爰及已下至一也治要自昔周之興也至一也俱無今晉之興也治要

無今功烈於百王事捷於三代蓋有爲以爲

之矣晉書無蓋有爲一句宣景遭多難之時務伐英雄

誅庶桀以便事晉書無務伐四字桀作孽不及脩公劉太

王之仁也受遺輔政屢遇廢置故齊王不明

不獲思庸於亳高貴沖人不得復子明辟二

祖逼禪代之期不暇待三分八百之會也治要

無功列已是其創基立本治要無異於先代

者也治要無者又已下至又字加之以朝寡

純德之士晉書無又之二鄉乏不二之老風

俗淫僻耻尚失所藝文耻尚學者以莊老為

宗而黜六經談者以虛薄為辯而賤名檢晉書

薄作蕩行身者以放濁治要濁為通而狹節

信治要信進仕者以苟得為貴而鄙居正藝文

無行身已下當官者以望空為高而笑勤恪二十四字

是以目三公爲蕭杌之稱標上議以虛談之

名

晉書無目三公至之名十六字治要無是以已下至之名藝文同

劉頌屢

言治道傳咸每糾邪正皆謂之俗吏其倚杖

虛曠依阿無心者皆名重海內

藝文無其倚杖已下十五

字

若夫文王日昃不暇仲山甫夙夜匪懈者

蓋其嗤黜

其舊誤其黜舊誤黜從晉書改

以爲灰塵而相詬

病矣

晉書無而相詬病四字治要無若夫已下至詬病矣

由是毀譽亂

於善惡之實情慙奔於貨慾之塗選者爲人

擇官官者

治要官者作宦者

爲身擇利

藝文下卽接其婦女莊櫛

而秉鈞當軸之士身兼官以十數大極其尊

小錄其要

治要錄作統

機事之失十恒八九

晉書無機

事八

而世族貴族之子弟

治要貴族作貴戚

陵邁超

越不拘資次悠悠風塵皆奔競之士列官千

百無讓賢之舉子眞著崇讓而莫之省子雅

列九班而不得用長虞數

治要無數字

直筆而不

能糾

晉書無長虞九字

其婦女莊櫛

治要櫛作飾

織紵皆

取成於婢僕未嘗知女工絲枲之業中饋酒

食之事也先時而婚任情而動

藝文無先時八字

故

皆不耻

治要作故不取誤

淫泆之過不拘妒忌之惡

有逆干舅姑有反易剛柔

藝文無有逆干十字

有殺戮

妾媵有黷亂上下

晉書無有逆干至上下二十字

父兄弗之

罪也天下莫之非也又況責之聞

治要聞作問

四

教於古脩貞順於今以輔佐君子者哉禮法

刑政於此大壞如室斯構而去其鑿契

晉書無如

室九字

如水斯積而決其隄防如火斯畜

治要

蓄而離其薪燎也國之將亡本必先顛其此

之謂乎

藝文引止此

故觀阮籍之所行而覺禮教

崩弛之所由察庾純賈充之事

治要事作爭

而見

師尹之多僻考平吳之功而知將帥之不讓

思郭欽之謀而悟戎狄之有釁覽傅玄劉毅

之言而得百官之邪核傳咸之奏錢神之論

而覩寵賂之章民風國勢如此雖以中庸之

才守文之主治之辛有必見之於祭祀季札

必得之於聲樂范熒必爲之請死賈誼必爲

之痛哭又況有

晉書有作我治要同

惠帝以蕩蕩

晉書作放

蕩

之德臨之哉故賈后肆虐於六宮韓午助

亂於外內其所由來者漸矣豈特繫一婦人

之惡乎

治要止此晉書無故賈后以下至惡乎

懷帝承亂之後

晉書無之後二字

得位羈於彊臣愍帝奔播之役徒

厠其虛名天下之政旣已去矣非命世之雄
不能取之矣然懷帝初載嘉禾生於南昌望
氣者又云豫章有天子氣及國家多難宗室
迭興以愍懷之正淮南之壯成都之功長沙
之權皆卒於傾覆而懷帝以豫章王登天位
劉向之讖云滅亡之後有少如水名者得之

起事者據秦川西南乃得其朋案愍帝蓋秦
王之子也得位於長安長安固秦地也而西
以南陽王爲右丞相東以琅邪王爲左丞相
上諱業故改鄴爲臨漳水名也由此推之亦
有徵祥而皇極不建禍辱及身豈上帝臨我
而貳其心將由人能弘道非道弘人者乎晉書
無然懷帝已下至淳耀之烈未渝故大命重
集於中宗元皇帝文選四十九又謝玄暉齊
厚下敬皇后哀策文注引仁以
羣書治要二十九載晉書自世祖正
位居體至一婦人之惡乎初學記九引史

臣曰至四海悅勸矣藝文十一引昔高祖宣皇帝至其此之謂乎
晉書五愍帝後全載此論而刪裁之
御覽三百引晉紀論將相侯王連頭受戮乞爲奴僕而猶不獲免嬪嬙妃主虜辱於戎卒豈不哀哉

晉紀論晉武帝革命

史臣曰帝王之興必俟天命苟有代謝非人事也文質異時興建不同故古之有天下者
柏皇栗陸以前爲而不有應而不求執大象
也鴻黃世及以一民也堯舜內禪體文德也
漢魏外禪順大名也湯武革命應天人也高

光爭伐定功業也各因其運而天下隨時隨
時之義大矣哉古者敬其事則命以始今帝
王受命而用其終豈人事乎其天意乎文選
九又高光爭伐定功業也見文選任彥昇王
文憲集序注初學記九鴻黃作鴻荒誤隨
時二字不重亦誤

高祖宣帝

魏武帝爲丞相命高祖爲文學掾每與謀策

畫多善

文選于令升晉紀總論注

魏文帝卽王位爲丞相長史明帝卽位遷驃

騎大將軍

文選同上

新城太守孟達反高祖親征之屠其城斬達

文選同上

高祖與曹爽俱受遺輔政爽橫恣日甚高祖
乃奏事永寧宮廢爽兄弟以侯歸第有司奏
黃門張當辭道爽反遂夷三族

文選同上

高祖東襲太尉王淩於壽春初淩以魏主非
明帝親生且不明也謀更立楚王彪聞軍至
面縛請降高祖解縛反服見之送至京師飲

藥而死

文選同上

世宗景帝

世宗景皇帝高祖崩以撫軍大將軍輔政

文選

晉紀總論注

中書令李豐推太常夏侯玄謀廢大將軍世

宗聞之乃遣王羨迎豐主豐知禍及遂肆惡

言勇士磔殺之玄夷三族

文選同上

御覽

書令李豐謀廢大將軍世宗使舍人王義請之豐來辭不遜左右以力環築腰死

揚州刺史文欽自曹爽死後陰懷異志乃矯

太后令罪狀世宗世宗自帥中軍討之欽敗
得入吳

文選同上

太宗文帝

太祖文皇帝母弟也

案母弟上宜有景帝之三字

世宗崩

進位大將軍錄尚書事輔政

文選晉紀總論注

天子命太祖爲晉公九錫之禮又進公爵爲

王

文選同上

鎮東大將軍諸葛誕貳於我太祖親率六軍
東征拔之斬誕首夷三族

文選同上

景元四年大舉伐蜀太祖部分諸軍指授方
畧使征西將軍鄧艾自狄道攻姜維於沓中
使鎮西將軍鍾會自駱谷襲漢中

文選同上

世祖武帝

泰始四年二月上幸芳林園與羣臣宴賦詩

觀志

文選應吉甫晉武帝華林園集詩注

武帝詔曰蓋德冠生民必饗不泯之榮

文選沈休

文齊故安陸昭王碑文注

孝懷帝

詔豫章王熾爲皇太弟皇帝崩太弟卽位崩
諡曰懷皇帝

文選晉紀總論注

初望氣者言豫章廣陵有天子氣

文選同上

賊劉曜入京都百官失守天子蒙塵於平陽
文選同上引晉懷紀

孝愍帝

洛京傾覆秦王業避難密南趣許潁豫州刺

史閭鼎以天下無主有輔立之計

文選晉紀總論注

關中建秦王業爲皇太子本吳孝王之子出

爲秦獻王後皇帝崩太子卽位於長安樹盜

曰愍皇帝

文選同上

劉曜寇長安劉粲寇於城下天子蒙塵於平

陽

文選同上引晉愍紀又劉越石勸進表注引晉紀首五字作賊入掠京都以下同

愍帝詔曰羣邪作逆傾蕩五都

文選劉孝標辯命論注

中宗元帝

愍帝詔琅邪王叡曰今以王爲侍中左丞相

督陝東諸軍事右丞相南陽王督陝右諸軍

事

文選晉紀總論注

武悼楊皇后

永平元年誅太傅楊駿遷太后楊氏於永寧宮廢爲庶人居於金墉城

文選晉紀總論注

賈惠皇后

賈庶人賜死初武帝爲太子取后在宮不恭遜而甚妒忌有孕者輒殺之或以手戡之

子隨刃墮

文選晉紀總論注

梁王彤

梁王彤爲征西太將軍

文選潘安仁馬汧督誄注

彤爲大都督督關中諸軍屯好時

文選同上

成都王穎

河間王頠表曰成都王穎明德茂親功高勲重

文選邱希範與陳伯之書注

東海王越

太傅東海王越總兵輔政

文選晉紀總論

鄧艾

鄧艾進軍城北蜀主劉禪面縛輿輓詣壘門

文選晉紀總論注

劉寔

時禮讓未興賢者壅滯少府劉寔著崇讓論
文選晉紀總論注

羊祜

征南大將軍羊祜來朝上疏云以國家之盛
強臨吳之危弊軍不踰時尅可必也上納之
而未宣
文選晉紀總論注

王濬

咸寧五年龍驤將軍王濬上疏曰吳王荒淫

且觀時運宜征伐上將許之賈充荀勗等畢
諫以爲不可張華固勸之杜預亦上疏上先
納羊祜之謀重之以濬預之決乃發詔諸方
大舉

文選晉紀總論注

咸寧五年十一月命安東將軍王渾龍驤將
軍王濬帥巴蜀之卒浮江而下太康元年四
月王濬鼓譟入於石頭吳主孫皓面縛輿觀
降於濬

文選同上又陸士衡辯亡論注引至
浮江而下王渾下有向揚州三字

王渾愧久造江而王濬先之乃表濬不受已

節度濬上書自陳曰惡直醜正實繁有徒欲
構南箕成此貝錦

文選同上

孟觀

太子太傅孟觀知中宮旨因謂二公欲行廢
立之事楚王瑋殺太宰汝南王亮太保衛瓘
張華以二公既亡楚必專權使董猛言於后
遣謁者李雲詔免瑋付廷尉瑋以矯詔伏誅

文選晉紀總論注

楊駿

楊駿爲太傅百官總已以聽於駿

文選潘安仁西征賦

注又引駿被誅三字上下疑有脫文

韓壽

韓壽妻賈午寔始助亂

文選晉紀總論注

嵇康 呂安

嵇康譙人呂安東平人與阮籍山濤及兄巽友善康有潛遯之志不能被褐懷寶矜才而上人安巽庶弟俊才妻美巽使婦人醉而幸之醜惡發露巽病之告安謗已巽與鍾會有

寵太祖遂徙安遠郡遺書與康昔李叟入秦
及關而嘆云太祖惡之追收下獄康理之俱
死文選向子期思舊賦注

阮籍

阮籍宏逸曠達居喪不帥常檢

文選晉紀總論注

何曾謂太祖曰阮籍如此何以訓世太祖曰
度外人也宜其容之

文選任彥昇齊竟陵文宣王行狀注

庾純

賈充饗衆客庾純後至充曰君行常在人先

今何以在後純曰有小市井事是以後俗言
純乃祖爲伍伯又曰充之先爲市魁故以戲
荅

文選晉紀總論注

劉頌

劉頌在朝忠正才經政事武帝重之訪以治
道悉心陳奏多所施行

文選晉紀總論注

劉弘

劉弘教曰太康以來天下共尙無爲貴談莊
老少有說事

文選晉紀總論注又引言君上
之議虛談也疑亦劉弘教中語

劉毅

上顧謂劉毅曰朕方漢何主對曰桓靈帝曰
吾雖不及古賢猶尅己爲治方之桓靈不亦
甚乎對曰桓靈賣官錢入於官陛下賣官錢
入私門以此言之殆不若也

文選晉紀總論注

傅玄

傅玄上書曰昔魏武虛無放誕之論盈於朝
野使天下無復清議而亡秦之病復發於今
文選晉紀總論注

傅咸

司隸校尉傅咸上書曰臣以貨賂流行所宜
深絕 文選晉紀總論注

郭啟

尚書郭啟出赴妹葬疾病不辭左丞傅咸糾
之尚書弗過 文選晉紀總論注

魯褒

魯褒字元道南陽人作錢神論 文選晉紀總
論注

滿奮

苗願殺司隸校尉滿奮文選沈休文奏彈王源注

丁覽

丁固父覽以孝義稱文選沈休文齊故安陸昭王碑文注

劉淵

太康八年詔淵領北部都尉文選晉紀總論注

劉淵遷離石遂謀亂淵在西河離石攻破諸郡縣自稱王文選同上

劉曜

劉曜入京都殺大將軍吳王晏光祿大夫竟

陵王其餘官僚僵尸塗地百不遺一

文選晉紀總論

注

王彌

王彌攻東莞東安二郡復攻青州

文選晉紀總論注

石冰

蜀賊李流攻益州發武勇以西赴益州兵不

樂西李辰因之誑曜百姓以山都民即沈為

主石冰應之石冰畧揚州揚州刺史蘇峻降

文選晉紀總論注引晉惠紀 已上俱文選

郭欽

太康五年侍御史郭欽上書曰戎狄彊自
古爲患魏初民寡西北諸邊郡皆爲戎居若
百年之後有風塵之警胡騎自平陽上黨不
三日而至孟津北地西河失土馮翊太原安
定裁居數縣其餘及上郡盡爲狄庭連接畿
甸宜及平吳之威出北地西河安定復上郡
實馮翊平陽統河北諸縣募取死罪徙三河
三魏見士四萬家以充之使裔不亂華漸徙

平陽弘農魏郡京兆上黨太原雜胡出於其
表峻四夷出入之防明先王荒服之制萬世
之長策也弗納羣書治要二十九文選晉
字侍御史作御史大夫疆橫作疆廣自古作
歷古無魏初民寡四字西北上有今字下無
諸邊二字皆為作皆與至孟津下即接及平
吳之威威作盛實焉翊平陽實作置下即云
帝不聽引自此止

孝惠帝

惠帝自鄴還洛張方以三千騎奉迎自河橋
至芒山旌旗前後相屬戈矛若林書鈔一百二十三陳

補

河間王顒

參軍宰吏惠帝立河間王爲太宰輔政置行
參軍不限數也

書鈔六十九

譙周

詔騎都尉譙周閑居中道不仕危國蜀亡之
際勸劉禪歸命有忠君濟民之謀又耽習典
藝博物洽聞朕甚嘉之以爲散騎常侍

書鈔五十

裴秀

裴秀制地圖有六體一曰分率二曰準望三曰道里四曰高下五曰方斜六曰迂直

書鈔一百一十七

劉毅

劉毅爲司隸校尉皇太子朝鼓吹入東掖門毅以爲不敬止之於門外奏劾保傅以下詔赦之然後入

書鈔一百三十

孫惠

東海王越治兵召下邳縣孫惠爲記室專掌

文疏

書鈔六十九

束皙

束皙爲祕書監賈誼請爲著作左郎難陸機

晉書限斷

書鈔五十七

傅咸

傅咸兼司隸校尉時朝廷寬宏豪右放恣郡縣從容寇賊充斥交相請託朝野溷濁咸於是數日之內三奏免送官奏案蹇諤終無所

撓有司肅然

書鈔六十一

傅咸在位多執正為豫州中正銓評之職

書鈔

同上

荀晞

荀晞為兖州刺史從母有子坐事從母向晞流涕叩頭中外皆乞終不得生死後哭之甚

悲曰殺卿者兖州刺史哭弟者荀道將也

書鈔

三十七

御覽二百五十八引從母作姨母

下作寡有一子坐小事下從母亦作姨母中

外上有及字乞下有活字終不得生作不聽

殺卿作殺弟哭弟作哭卿

劉蕃

劉蕃爲江夏高新令及卒百姓如喪父母將歸不受祭吏民往往相聚於路側望柩設奠酹而哭之

書鈔七十八

王導

王導爲司徒置西屬一人佐長史參定九品也

書鈔六十八

刁協

丞相王導爲協少有令譽乃以爲撫軍行叅

軍書鈔六十九

卞壺

卞壺遷太子詹事世稱壺裁斷朝廷實忠於
事上也

書鈔六十五 已上俱書鈔

高祖宣帝

魏國旣建高祖遷太子中庶子與陳羣吳質
朱鑠號曰四友

初學記九

天子疾篤帝與曹眞陳羣等見於崇華殿之
南堂並受顧命輔政詔太子曰有間此三公

者慎勿疑之帝卽位改封舞陽侯

同上
已
初學記

世祖武帝

武帝自咸寧三年至太康元年木連理八生

藝文九十八

杜預

杜預作河橋成武帝幸橋譙舉觴勸預曰非卿此功不成就預曰自非陛下之聖明則臣無所施其愚巧也

藝文七十二

石崇

石崇有妓人曰綠珠美而工舞孫秀乃使人
求焉崇方登涼觀臨清水婦人侍側使者以
告崇崇出妓妾數十人皆蘊蘭麝而被羅縠
曰在所擇使者曰君侯服御美則美矣然本
受旨索綠珠崇勃然曰綠珠吾所愛重不可
得也使者還以告故秀勸趙王倫殺之藝文十八
御覽三百八十引美而工舞作美如玉善
舞美則美矣作麗矣吾所愛下無重字不可
得也下有使者曰願加三思崇曰不然十一
字已上藝文

世祖武帝

武帝太熙元年太廟梁折四月世祖崩開元占經
一百十四

高祖宣帝

帝配饗魏太祖廟有奏諸功臣從饗者更以
官爲次在荀郭之上御覽五百二十六

惠賈皇后

賈庶人未害愍懷太子時有謠曰南風烈烈
吹白沙千歲髑髏生齒牙南風庶人名愍懷
小名沙門御覽三百六十八

初賈后造首紒以繒縛其髻天下化之名頽
子紒也

御覽三百七十三

劉寔

鍾會鄧艾將伐蜀與劉寔別客謂寔曰二將
當破蜀否寔曰必破但皆不還客問其故寔
曰治道在於克讓因著崇讓論曰季世不能
讓賢虛謝見用之恩莫肯讓十勝已

御覽四百二十一

羊祜

武帝詔曰散騎常侍中軍將軍羊祜秉德清
勁經緯文武雖處腹心之任不總樞機之重
非垂拱無爲委任責成之意也以祜爲尙書
左僕射衛將軍

御覽二百十一

王濬

王濬在巴郡兵民苦役生男多不舉濬乃嚴
其殺子之防而厚卹之所有者數十人於此
能稱兵矣父母戒之曰王府君生爾必免之
無愛生

御覽四百七十九

賈充

太尉魯公賈充薨初賈用韓謚爲賈氏嗣上
特許之及議謚博士秦秀曰充位冠羣后惟
民之望而悖禮溺情以亂大倫案謚法昏亂
紀度曰荒充宜謚曰荒上弗從賜謚曰武
五百六十二

何曾

何曾卒下禮官謚博士秦秀議曰曾資性驕
奢不修軌則奕世以來宰臣輔相未有受詔

辱之聲被有司之劾父子塵累而蒙恩貸若
會者也謹案諡法名與實爽曰繆怙威肆行
曰醜宜諡爲繆醜

御覽五百六十二

文淑

文淑字次騫小名騫有武力籌策楊林胡烈
爲虜所害武帝西憂遣淑出征所向摧靡秦
涼遂平名震天下爲東夷校尉姿器旅力萬
人之雄

御覽二百七十五

馮恢

處士馮恢志行過人以爲散騎侍郎張華曰
臣請觀之若不見臣上也見而有傲世之容
次也敬而爲賓主者固俗士也乃華至恢待
之恭於是時人少之

御覽二百二十四

呂安

呂安友嵇康相思則命駕千里從之或遇其
行康兄喜位至方伯拭席而待弗之顧也獨
宿車中康母設酒求康兒其戲則去

御覽四百九十八

文選陸韓卿奉荅內兄希叔詩注引初

呂安友嵇康至千里從之

董仲道

庶人楊氏幽於金墉城陳留董仲道遊於太學喟然而嘆曰建斯室也何爲者乎每見國家赦書謀反大逆皆除其殺祖父母父兄者不除以爲道法所不容也何今日公卿處議文飾典禮以至此事乎天理之理旣惑大亂將作矣顧謂謝鯤阮千里等曰易稱知幾其神卿等各可深逃乃自荷擔妻子推鹿車以入於蜀山莫知所往

御覽六百五十二

閻纘

閻纘爲人鯁直不畏強禦初仕爲太傅楊駿舍人 御覽二百四十九

傅咸

傅咸爲司徒長史多所執正 御覽二百九

華譚

華譚依周馥及琅邪王遣甘卓攻馥譚先於卓有恩卓募人入城求譚入者至舍問華侯在否吾甘揚威使也譚曰不知華侯所在抽

絹二疋授之使人還以告卓曰是華侯也

御覽

鄭默

大鴻臚鄭默有母喪旣葬有司依常使還攝職默固陳執久乃許之於是定令聽大臣得終喪焉

御覽五百四十五

朱沖

南安朱沖其鄰人失犢與沖犢相類來取之沖不與爭後得之於堅冰之下慙謝沖沖不

受御覽八百九十八

管輅

初管輅至母邱氏墓下倚樹哀吟精神不樂
林木雖茂無形可交碑誄雖美無後可守
御覽
五十七

孫皓

孫皓遣使詔書賜班鬪五十張絳鬪二十張
紫青鬪各五十張
御覽八百十六

成夫人

晉永嘉初有神見兖州甄城民家免奴爲主簿自號爲樊道基有姬號成夫人欲迎致便載車行當得此免奴主簿從行爲譯以宣所宜汝南梅蹟字仲眞去鄴來經兖州聞其然因結羊世茂阮士公諸賓往觀之成夫人便遣主簿出當與貴客語主簿死不肯避成夫人因大嗔索士公馬鞭脫主簿鞭之

御覽三百五十九

人產龍

愍帝建興三年抱罕妓人產一龍子色似錦
文望之如見神光在牀下少有就視者御覽三百六十一

盤瓠

武陵長沙郡夷盤瓠之後也雜處五服之內
憑土阻險每常爲獠雜魚肉而歸以祭盤瓠
俗稱赤髓橫裙子孫御覽七百八十五

白石綺

初洛中名服有白石綺識者尤之曰石非繒

綵之稱

御覽八百十六

已上俱御覽

魏文帝

魏文帝臨江嘆曰嗟乎固天所以限南北也
寰宇記江南東道潤州丹徒縣

孟宗

孟宗江夏人遷吳會時制不得將家行每得
時味必以寄母

緯畧六

孫皓

吳王孫皓將其子瑾等泥首面縛降王濬

後漢

書隗囂公孫述傳論注

案晉書五行志孫休後衣服之制上長下短又積領五六而裳居一二平寶曰上饒奢下儉逼上有餘下不足之妖也至孫皓果奢暴恣情於上而百姓彫困於下卒以亡國是其應也又云武帝泰始初衣服上儉下豐著衣者皆厭襖此君衰弱臣放縱下捲上之象也至元康末婦人出兩襜加乎交頤之上此內出外也爲車乘者苟貴

輕細又數變易其形皆以白箴爲純蓋古
喪車之遺像也夫乘者君子之器蓋君子
立心無恒事不崇實也干寶以爲晉之禍
徵也及惠帝踐祚權制在於寵臣下掩上
之應也至永嘉末六宮才人流冗沒於戎
狄內出外之應也及天下撓亂宰輔方伯
多負其任又數改易不崇實之應也又云
元康太安之間江淮之域有敗屨白聚於
道多者至四五十量人或散投坑谷明日

視之復如故或云見狸銜聚之千寶以爲
夫孺者人之賤服處於勞辱黔庶之象也
敗者疲弊之象道者四方往來所以交通
王命也今敗孺聚於道者象黔庶罷病將
相聚爲亂以絕王命也太安中發壬午兵
百姓怨叛江夏張昌唱亂荆楚從之如流
於是兵革歲起服妖也又云魏明帝景初
二年廷尉府中雌雞化爲雄不鳴不將千
寶曰是歲宣帝平遼東百姓始有與能之

義此其象也然晉三后並以人臣終不鳴
不將又天意也又云愍帝建武元年六月
揚州旱去年十二月淳于伯寃死其年卽
旱而大興元年六月又旱于寶曰殺淳于
伯之後旱三年是也又云武帝太康六年
南陽獻兩足猛獸此毛蟲之孽也于寶以
爲獸者陰精居於陽金獸也南陽火名也
金精入火而失其形王室亂之妖也六水
數言水數旣極火慝將作而金受其敗也

至元康九年始殺太子距此十四年二十七
十四火始終相乘之數也自帝受命至愍
懷之廢凡三十五年焉又云吳孫亮五鳳
二年五月陽羨縣離里山大石自立千寶
以爲孫皓承廢故之象得位其應也或曰
孫休見立之祥也又云太安元年丹陽湖
熟縣夏架湖有六石浮二百步而登岸民
驚噪相告石夾千寶曰尋有石冰入建鄴
又云天紀三年八月建鄴有鬼目菜於工

黃狗家生依綠棗樹長丈餘莖廣四寸厚二分又有蕒菜生工吳平家高四尺如枇杷形上圓徑一尺八寸莖廣五寸兩邊生葉綠色東觀案圖名鬼目作芝草蕒菜作平慮遂以狗爲侍之郎平爲平慮郎皆銀印青綬干寶曰明年平吳王濬止船正得平渚姓名顯然指事之徵也黃狗者吳以土運承漢故初有黃龍之瑞及其季年而有鬼目之妖託黃狗之家黃稱不改而貴

賤大殊天道精微之應也又云惠帝元康
五年三月呂縣有流血東西百餘步此赤
祥也至元康末窮凶極亂僵屍流血之應
也千寶以爲後八載而封雲亂徐州殺傷
數萬人是其應也又云愍帝建興四年十
二月景寅丞相府斬督運令史淳于伯血
逆流上柱二丈三尺此赤祥也是時後將
軍褚裒鎮廣陵丞相揚聲北伐伯以督運
稽留及役使贓罪依軍法戮之其息訴稱

督運事訖無所稽乏受賕役使罪不及死
兵家之事先聲後實實是屯戍非爲征軍
自四年已來運漕稽停皆不以軍興法論
僚佐莫之理及有變司直彈劾衆官元帝
不問干寶以爲冤氣之應也又云魏明帝
青龍元年正月甲申青龍見邺之摩陂井
中九瑞興非時則爲妖孽況困於井非嘉
祥矣魏以改年非也干寶曰自明帝終魏
世青龍黃龍見者皆其主廢興之應也魏

土運青木色而不勝於金黃得位青失位之象也青龍多見者君德國運內相尅伐也故高貴鄉公卒敗於兵又云孫休永安四年吳民陳焦死七日復生穿冢出干寶曰此與漢宣帝同事烏承侯皓承廢故之象得位之祥也案已上敘說不無晉書文飾其辭然旣引干寶曰是必干寶晉紀所有故備錄之

又宋書五行志亦引干寶曰茲不備載

附司徒儀

左長史之職掌差次九品銓衡人倫也

書鈔六十九

八

左長史職掌佐公修文政掌察郡吏

同上

司馬之職掌佐公修武政簡其軍旅飾其器

械也

同上

從事中郎之職分曹綱紀其事維正大禮

同上

掾屬之職敦明教義肅厲清風以訓羣吏以

重朝望

同上

錄事之職掌總錄衆曹管其文案

書鈔六十九

錄事叅軍掌舉直錯枉

同上

記室掌表章啟奏

同上

記室之儀凡有表章雜記之書掌創其草

同上

記室之職凡掌文墨表章弔賀之禮題署也

同上

中兵叅軍掌督帳內牙門將及軍器給其軍

事也

同上

中兵之任凡在軍者以時科其器械綜其人

數罰姦詐均勞逸

同上

從事中郎之職各掌其所治之曹而紀綱其
事維正大體叅輔謀議

御覽二百九

左長史職掌檢其法憲明其分職

同上

掾屬之職敦明教義肅厲清風非禮不言非
法不行以訓羣吏以貴朝望各掌其所曹之
治

同上

行叅軍之職凡使命及督察復行之事彈劾
逋違獻納聞見以達視聽

御覽二百四十九

寸史鉤沉

逸書

習鑿齒漢晉春秋

甘泉黃奭學

劉璋

張松見曹公曹公方自矜伐不存錄松松歸

乃勸璋自絕

二國蜀志劉璋傳注要二十七蜀志注

羣書治

先主

涿人李定云此家必出貴人

蜀志先主傳注御覽一百十

七引蜀志下小注

太祖之始征柳城劉備說表使襲許表不從

及太祖還謂備曰不用君言故失此大會也
備曰今天下分裂日尋干戈事變之來豈有
終極乎若能應之於後者則此未足爲恨也
魏志劉表傳注又蜀志先主傳注引曹公自
柳城還表謂備曰不用君言以下同

劉表

表荅羲曰內不失貢職外不背盟主此天下
之大義也治中何獨怪乎
魏志劉表傳上義
謂鄧羲

後主

先主入益州吳遣迎孫夫人夫人欲將太子

歸吳諸葛亮使趙雲勒兵斷江留太子乃得止蜀志先主謬皇后傳注

冬十月江陽至江州有鳥從江南飛渡江北不能達壘水死者以千數蜀志後主傳注

司馬文王與禪宴爲之作故蜀技旁人皆爲感愴而禪喜笑自若王謂賈充曰人之無情乃可至於是乎雖使諸葛亮在不能輔之久全而況姜維耶充曰不如是殿下何由并之他日王問禪曰頗思蜀否禪曰此間樂不思

蜀郤正聞之求見禪曰若王後問宜泣而荅
曰先人墳墓遠在隴蜀乃心心悲無日不思
因閉其目會王復問對如前王曰何似郤正
語耶禪驚視曰誠如尊命左右皆笑蜀志後主傳注
御覽五百六十八引晉文王與劉禪宴爲
之作蜀妓樂至何由併之下有哉字微節數
字又四百九十九引司馬文王問劉禪曰頗
思蜀不禪曰此間樂不思蜀也郤正聞之求
見禪曰若王後問宜泣而後荅會王復問禪
曰先人墳墓遠在隴蜀乃心西望無日不思
因閉其眼王曰何以似郤正語耶禪驚視曰
如尊命左右皆大笑

北地王劉謐

後主將從譙周之策北地王譙怒曰若理窮力屈禍敗必及便當父子君臣背城一戰同死社稷以見先帝可也後主不納遂送璽綬是日譙哭於昭烈之廟先殺妻子而後自殺左右無不爲涕泣者蜀志後主傳注御覽四百三十八引至然後自殺理窮作數窮

李昭儀

魏以蜀宮人賜諸將之無妻者李昭儀曰我不能二三屈辱乃自殺蜀志張皇后傳注

諸葛亮

亮家於南陽之鄧縣在襄陽城西二十里號

曰隆中

蜀志諸葛亮傳注

文選諸葛孔明

縣

出師表注引諸葛亮家於南陽之鄧

亮在南中所在戰捷聞孟獲者爲夷漢並所服募生致之旣得使觀於營陣之間問曰此軍何如對曰向者不知虛實故敗今蒙賜觀看營陣若祇如此卽定易勝耳亮笑縱使更戰七縱七擒而亮猶遣獲獲止不去曰公天

威也南人不復反矣遂至滇池南中平皆印

其渠率而用之或以諫亮亮曰若留外人則

當留兵兵留則無可食一不易也加夷新喪

破父兄死喪留外人而無兵者必成禍患二

不易也又吏累有廢殺之罪自嫌覺重若留

外人終不相信三不易也今吾欲使不留兵

不運糧而綱紀粗定夷漢粗安故耳蜀志諸葛亮傳

注書鈔一百十八陳壽引諸葛亮在南中

所任戰捷既得孟獲使觀於營陣之間已下

下同蜀志注引至七縱七擒

或勸亮更發兵者亮曰大軍在祁山箕谷皆多於賊而不能破賊爲賊所破者則此病不在少也在一人耳今欲減兵損將明罰思過校變通之道於將來若不能然者雖兵多何益自今已後諸有忠慮於國但勤攻吾之闕則事可定賊可死功可躋足而待矣於是考微勞甄烈壯引咎責躬布所失於天下厲兵講武以爲後圖戎士簡練民忘其敗矣亮聞孫權破曹休魏兵東下關中虛弱十一月上

言曰先帝慮漢賊不兩立王業不偏安故託臣以討賊也以先帝之明量臣之才故知臣伐賊才弱敵強也然不伐賊王業亦亡惟坐待亡孰與伐之是故託臣而弗疑也臣受命之日寢不安息食不甘味思惟北征宜先入南故五月渡瀘深入不毛並日而食臣非不自惜也願王業不得偏全於蜀都故冒危難以奉先帝之遺意也而議者謂爲非計今賊適疲於西又務於東兵法乘勞此進趨之時

謹陳其事如左高帝明並日月謀臣淵深然涉險被創危然後安今陛下未及高帝謀臣不如良平而欲以長計取勝坐定天下此臣之未解一也劉繇王朗各據州郡論安言計動引聖人羣疑滿腹衆難塞胸今歲不戰明年不征使孫策坐大遂并江東此臣之未解二也曹操智計殊絕於人其用兵也彷彿孫吳然困於南陽險於烏巢危於祁連偏於黎陽幾敗北山殆死潼關然後僞定一時何況

臣才弱而欲以不危而定之此臣之未解三也曹操五攻昌霸不下四越巢湖不成任用李服而李服圖之委夏侯而夏侯敗亡先帝每稱操爲能猶有此失況臣驚下何能必勝此臣之未解四也自臣到漢中中間朞年耳然喪趙雲陽羣馬玉閭芝丁立白壽劉郃鄧銅等及曲長屯將七十餘人突將無前賓叟青羌散騎武騎一千餘人此皆數十年之內所糾合四方之精銳非一州之所有若復數

年則損三分之二也當何以圖敵此臣之未
解五也今民窮兵疲而事不可息事不可息
則住與行勞費正等而不及虛圖之欲以一
州之地與賊持久此臣之未解六也夫難平
者事也昔先帝敗軍於楚當此時曹操拊手
謂天下已定然後先帝東連吳越西取巴蜀
舉兵北征夏侯授首此操之失計而漢事將
成也然後吳更敗盟關羽毀敗秭歸蹉跎曹
丕稱帝凡事如是難可逆見臣鞠躬盡力死

而後已至於成敗利鈍非臣之所能逆觀也

於是有散關之役此表亮集所無出張儼默

記

蜀志諸葛亮傳注

書鈔

一百十三陳補

躡

足而待矣

白帖善敗引街亭敗後或勸

諸

葛亮更發兵至民忘其敗中多刪截

是歲孫權稱尊號其羣臣以並尊二帝來告

議者咸以爲交之無益而名體弗順宜顯名

正義絕其盟好亮曰權有僭逆之心久矣國

家所以略其釁情者求犄角之援也今若加

顯絕仇我必深便當移兵東戍與之角力須

并其土乃議中原彼賢才尙多將相輯穆未
可一朝定也頓兵相持坐而須老使北賊得
計非算之上者昔孝文卑辭匈奴先帝優於
吳盟皆應權通變弘思遠益非匹夫之爲忿
者也今議者咸以權利在鼎足不能併力且
志望以滿無上圻之情推此皆似是而非也
何者其智力不侔故限江自保權之不能越
江猶魏賊之不能渡漢非力有餘而利不取
也若大軍致討彼上當分裂其地以爲綏

下富略民廣境示武於內非端坐者也若就
其不動而睦於我我之北伐無東顧之憂河
南之衆不得盡西北之爲利亦已深矣權儼
之罪未宜明也乃遣衛尉陳震慶權正號蜀志
諸葛亮傳注

亮聞祁山詔鮮卑柯比能比能等至故止地
石城以應亮於是魏大司馬曹真有疾司馬
宣王自荊州入朝魏明帝曰西方事重非君
莫可付者乃使西屯長安督張郃費耀戴陵

郭淮等宣王使戴陵留精兵共四千守上邽
餘衆悉出而救祁山郃欲分兵駐雍郿宣王
曰料前軍能獨當之者將軍言是也若不能
當而分爲前後此楚之三軍所以爲黥布擒
也遂進亮分兵留攻自逆宣王於上邽郭淮
費曜等徼亮亮破之因大芟刈其麥與宣王
遇於上邽之東斂兵依險軍不得交亮引而
還宣王尋亮於鹵城張郃曰彼遠逆我請戰
不得謂我利在不戰欲以長計制之也其祁

山知大軍已在近人情自固可止屯於此分
爲奇兵示出其後不宜進前而不敢偏坐失
民望也今亮縣軍食少亦行去矣宣王不從
故尋亮旣至又登山掘營不肯戰賈詡魏平
數請戰因曰公畏蜀如虎奈天下笑何宣王
病之諸將咸請戰五月辛巳乃使張郃攻無
當監何干於南圍自按中道向亮亮使魏延
高翔吳班赴拒大破之獲甲首三千級玄鎧
五千領角弩三千一百張宣王還保營

蜀志諸葛

亮傳注

御覽三百三十七引

柯作軻駐雍

下無郢字微作邀其麥下無與字亮引下有

兵字以在近無在字示出作亦出故尋亮故

作固如虎作如畏虎何干作何平南園作南

國鎧上無玄字無角弩三千一百張七字

亮自至數挑戰宣王亦表固請戰使衛尉辛

毗持節以制之姜維謂亮曰辛佐治仗節而

到賊不復出矣亮曰彼本無戰情所以固請

戰者以示武於其衆耳將在軍君命有所不

受苟能制吾豈千里而請戰耶蜀志諸葛亮傳注

亮卒於郭氏塢

蜀志諸葛亮傳注

楊儀等整軍而出百姓奔告宣王宣王追焉
姜維令儀反旗鳴鼓若將向宣王者宣王乃
退不敢偏於是儀結陣而去入谷然後發喪
宣王之退也百姓爲之諺曰死諸葛走生仲
達或以告宣王宣王曰吾能料生不能料死
也劉志諸葛亮傳注御覽四百九十六引
諸葛亮卒楊儀整軍而出宣王不敢逼臣
姓諺曰死諸葛走生仲達

費禕

費禕謂維曰吾等不如丞相亦已遠矣丞相

猶不定中夏況吾等乎且不如保國治民敬
守社稷如其功業以俟能者無以爲希冀傲
倖而決成敗於一舉若不如志悔之無及

蜀志

姜維傳注

姜維

恪使司馬李衡往蜀說姜維令同舉曰古人
有言聖人不能爲時時至亦不可失也今敵
政在私門外內猜隔兵挫於外而民怨於內
自曹操以來彼之亡形未有如今者也若大

舉伐之使吳攻其東漢入其西彼救西則東
虛重東則西輕以練實之軍乘虛輕之敵破
之必矣維從之

吳志諸葛恪傳注

會陰懷異圖維見而知其心謂可構成擾亂
以圖克復也乃詭說會曰聞君自淮南以來
算無遺策晉道光昌皆君之力今復定蜀威
德振世民高其功主畏其謀欲以此安歸乎
夫韓信不背漢於擾攘以見疑於旣平大夫
種不從范蠡於五湖卒伏劍而妄死彼豈聞

主愚臣哉利害使之然也今君大功既立大德已著何不法陶朱公泛舟絕迹全功保身登峨眉之嶺而從赤松遊乎會曰君言遠矣我不能行且爲今之道或未盡於此也維曰其他則君智力之所能無煩於老夫矣由是情好歡甚

蜀志姜維傳注

藝文二十五引

遺策下卽接今復定蜀云云利害使之然也下卽云何不法陶朱公至老夫矣無末六字

廖化

景耀五年姜維率衆出狄道廖化曰兵不戢

必自焚伯約之謂也知不出敵而力少於寇
用之無厭何以能立詩云不自我先不自我
後今日之事也

蜀志宗預傳注

傅僉

蔣舒將出降乃詭謂傅僉曰今賊至不擊而
閉城自守非良圖也僉曰受命保城惟全爲
功今違命出戰若喪師負國死無益矣舒曰
子以保城獲全爲功我以出戰克敵爲功各
行其志遂率衆出僉謂其戰也至陰平以降

胡烈烈乘虛襲城僉格鬪而死魏人義之蜀志
姜維傳注

霍弋

霍弋聞魏軍來弋欲赴成都後主以備敵旣
定不聽及成都守弋素服號哭大臨三日
諸將咸勸宜速降弋曰今道路隔塞未詳主
之安危大故去就不可苟也若主上與魏和
見遇以禮則保境而降不晚也若萬一危辱
吾將以死拒之何論遲速耶得後東遷之問

始率六郡將守上表曰臣聞人生於三事之
如一惟難所至則致其命今臣國敗主附守
死無所是以委質不敢有二晉文王善之又
拜南中都督委以本任後遣將兵救援呂興
平交趾日南九真三郡功封列侯進號崇賞
焉弋孫彪晉越嶲太守

蜀志霍峻傳注

袁紹 公孫瓚

袁紹與瓚書曰孤與足下既有前盟舊要申
之以討亂之誓愛過夷叔分著丹青謂爲旅

力同仇足踵齊晉故解印釋紱以北帶南分
割膏腴以奉執事此非孤赤情之明驗耶豈
寤足下奔烈士之高義尋禍亡之險蹤而改
慮以好易怨盜遣士馬犯暴豫州始聞甲卒
在南親臨戰陣懼於飛矢迸流狂刃橫集以
重足下之禍徒增孤子之咎釁也故爲薦書
懇惻冀可改悔而足下超然自逸矜其威勢
謂天罔可吞英雄可滅果令貴弟殞於鋒刃
之端斯言猶在於耳而足下曾不尋討禍源

克心罪已苟欲逞其無疆之怒不顧順逆之
計阨怨害民騁於余躬遂躍馬控弦處我疆
土毒徧生民辜延白骨孤辭不獲已以盍界
橋之役是時足下兵氣靈震駿馬電發侯師
徒肇機械不嚴強弱殊科衆寡異論假天之
助小戰大克遂陵躡奔背因壘館穀此非天
威裴謐福豐有禮之符表乎足下志猶未厭
乃復糾合餘燼率我蜂賊以焚渤海孤又不
獲寧用及龍河之師羸兵前誘大軍未濟而

足下膽破衆散不鼓而敗兵衆擾亂君臣並
奔此又足下之爲非孤之咎也自此以後禍
隙彌深孤之師旅不勝其忿遂至積尸爲京
頭顱滿野愍彼無辜未嘗不慨然失涕也後
比得足下書辭意婉約有改往修來之言僕
旣欣於舊好克復且愍兆民之不寧每輒引
師南駕以順簡書弗盈一時而北邊羽檄之
文未嘗不至孤用是痛心疾首靡所錯情夫
處三軍之帥當列將之任宜令怒如嚴霜喜

如時兩臧否好惡坦然可觀而足下二三其
德強弱易謀急則曲躬緩則放逸行無定端
言無質要爲壯士者固若此乎旣乃殘殺老
弱幽土憤怨衆叛親離子然無黨又烏丸穢
貊皆與足下同州僕與之殊俗各奮迅激怒
爭爲鋒銳又東西鮮卑舉踵來附此非孤德
所能招乃足下驅而致之也夫當荒危之世
處干戈之險內違同盟之誓外失戎狄之心
兵興州壤禍發蕭牆將以定霸不亦難乎前

以西山陸梁出兵平討會翹義餘殘畏誅逃
命故遂住大軍分兵撲蕩此兵孤之前行乃
界橋舉旗拔壘先登制敵者也始聞足下鑄
金紆紫命以元帥謂當因茲奮發以報孟明
之耻是故戰夫引領竦望旌旆怪遂含光匿
影寂爾無聞卒臻屠滅相爲惜之夫有平天
下之怒希長世之功權御師徒帶養戎馬叛
者無討服者不收威懷並喪何以立名今舊
京克復天罔云補罪人斯亡忠幹翼化華夏

儼然望於穆之作將戢干戈放散牛馬足下
獨何守區區之士保軍內之廣甘惡名以速
朽亡令德之久長壯而籌之非良策也宜釋
然除嫌敦我舊好若斯言之玷皇天是聞瓚
不答而增修戎備謂關靖曰當今四方虎爭
無有能坐我城下相守經年者明矣袁本初
其若我何

魏志公孫瓚傳注

關靖

關靖曰吾聞君子陷人於危必同其難豈可

獨生乎乃策馬赴紹軍而死紹悉送其首於
許魏志公孫瓚傳注

張郃

郃說紹曰公雖連勝然勿與曹公戰也密遣
輕騎鈔絕其南則兵自敗矣紹不從之魏志張郃傳注

許攸

許攸說紹曰公無與操相攻也急分諸將持
之而徑從他道迎天子則事立濟矣紹不從

曰吾要當先圍取之攸怒

魏志武帝紀注

審配

審配獻書於譚曰春秋之義國君死社稷忠臣死王命苟有圖危宗廟敗亂國家王綱典律親疎一也是以周公垂泣而蔽管蔡之獄季友歔歔而行鍼叔之鳩何則義重人輕事不得已也昔衛靈公廢蒯瞶而立輒蒯瞶爲不道入戚以篡衛師伐之春秋傳曰石曼姑之義爲可以拒之是以蒯瞶終獲叛逆之罪

而曼姑永享忠臣之名父子猶然豈况兄弟
乎昔先公廢黜將軍以續賢兄立我將軍以
爲嫡嗣上告祖宗下書譜牒先公謂將軍爲
兄子將軍謂先公爲叔父海內遠近誰不備
聞且先公卽世之日我將軍斬衰居廬而將
軍齋於聖室出入之分於斯益明是時凶臣
逢紀妄畫蛇足曲辭詔媚交亂懿親將軍奮
赫然之怒誅不旋時將軍亦奉命承旨加以
淫州自是之後癰疽破潰骨肉無絲髮之嫌

自疑之臣皆保生全之福茲悉遣強胡簡命
名將料整器械選擇戰士殫府庫之財竭食
土之實其所以供奉將軍何求而不備君臣
相率共衛旌麾戰爲雁行賦爲幣主雖傾倉
覆庫剪剝民物上下歡戴莫敢告勞何則推
戀戀忠赤之情盡家家肝腦之計脣齒輔車
不相爲賜謂爲將軍心合意同溫齊一體必
當并威偶勢禦寇寧家何圖凶險讒慝之人
造飾無端誘導奸利至令將軍翻然改圖忘

孝友之仁聽豺狼之謀誣先公廢立之言違
近者在喪之位悖綱紀之理不顧順遂之節
橫易冀州之主欲當先公之繼遂放兵鈔撥
屠城殺吏父尸盈原裸民滿野或有髡髮
膚割截支體冤魂痛於幽冥創痍號於草棘
又乃圖獲鄴城許賜秦胡財物婦女豫有分
界或聞告令吏士云孤雖有老母輒使身體
完具而已聞此言者莫不驚愕失氣悼心揮
淚使太夫人憂哀憤懣於堂室我州君臣士

友假寐悲嘆無所措其手足念欲靜師拱默
以聽執事之圖則懼違春秋死命之節貽太
夫人不測之患隕先公高世之業且三軍憤
慨人懷私怒我將軍辭不獲已以及館陶之
役是時外爲禦難內寔乞罪旣不見赦而屠
辱各三三其心臨陣叛戾我將軍進退無功
首尾受敵引軍奔避不敢告辭亦謂將軍當
少垂親親之仁貺以緩追之惠而乃尋蹤躡
軌無所逃命困獸必鬪以干嚴行而將軍師

旅土崩瓦解此非人力乃天意也是後又望將軍改往修來克己復禮追還孔懷如初之愛而縱情肆怒趣破家門企踵鶴立連結外讐散鋒放火播增毒螫烽烟相望涉血千里遺城厄民引領悲怨雖欲勿救惡得已哉故遂引軍東轅保正疆場雖近郊壘未侵境城然望旌麾能不永嘆配等備先公家臣奉廢立之命而圖等干國亂家禮有常刑故奮敝州之賦以除將軍之疾若乃天啟於心早行

其誅則我將軍匍匐悲號於將軍股掌之上
配等亦袒躬布體以待斧鉞之刑若必不悛
有以國斃圖頭不懸軍不旋踵願將軍詳度
事宜錫以環玦

魏志袁紹傳注

魏明帝

氐池縣大柳谷夜激波涌溢其聲如雷曉而
有蒼石立水中長一丈六尺高八尺白石畫
之爲十三馬一牛一鳥八卦玉玦之象皆隆
起其文曰大討曹適水中甲寅帝惡其討也

使鑿夫爲計以蒼石窒之宿昔而白石滿焉

至晉初其文愈明馬象皆煥徹如玉焉

魏志明帝

紀注

初學記八引大柳谷至如雷酒作滿

帝徙盤盤折聲聞數十里金狄或泣因留於

霸城

魏志明帝紀注

史官言於帝曰此周之分野也洛邑惡之於

是大修禳禱之術以厭焉

魏志明帝紀有彗星見張宿下注

帝以燕王宇爲大將軍使與領軍將軍夏侯

獻武衛將軍曹爽屯騎校尉曹肇驍騎將軍

秦朗等對輔政中書監劉放令孫資久專權
寵爲朗等素所不善懼有後害因圖間之而
宇常在帝側故未得有言甲申帝氣微宇下
殿呼曹肇有所議未還而帝稍聞惟曹爽獨
在放知之呼資與謀資曰不可動也放曰俱
入鼎鑊何不可之有乃突前見帝垂泣曰陛
下氣微若有不諱將以天下付誰帝曰卿不
聞用燕王耶放曰陛下忘先帝詔勅藩王不
得輔政且陛下方病而曹肇秦朗等便與才

人侍疾者言戲燕王擁兵南面不聽臣等入此卽豎刁趙高也今皇太子幼弱未能統政外有彊暴之寇內有勞怨之民陛下不遠慮存亡而近係舊恩委祖宗之業付二三凡士寢疾數日外內擁隔社稷危殆而已不知此臣等所以痛心也帝得放言大怒曰誰可任者放資乃舉爽代宇又白宜詔司馬宣王使相參帝從之放資出曹肇入涕泣固諫帝使肇勅停肇出戶放資趨而往復說止帝帝

從其言放曰宜爲手詔帝曰我困篤不能
卽上牀執帝手強作之遂齎出大言曰有詔
免燕王宇等官不得停省中於是宇等獻朗
相與泣而歸第

魏志明帝紀注

高貴鄉公

帝乞言於祥祥對曰昔者明王禮樂旣備加
之以忠誠忠誠之發形於言行夫大人者行
動乎天地天且弗違況於人乎

魏志高貴鄉公紀注

是時龍仍見咸以爲吉祥帝曰龍者君德也

上不在天下不在田而數屈於井非嘉兆也
乃作潛龍之詩以自諷司馬文王見而惡之
魏志同上

自曹芳事後魏人省徹宿衛無復鎧甲諸門

戎兵老弱而已

已上二十三字見世說
方正簞注魏志注無

曹髦

見威權日去不勝其忿乃召侍中王沉尙書

王經散騎常侍王業謂曰司馬昭之心路人

所知也吾不能坐受廢辱今日當與卿自出

討之王經諫曰昔魯昭公不忍季氏敗走失

國爲天下笑今權在其門久矣朝廷四方皆爲之致死不顧逆順之理非一日也且宿衛空闕兵甲寡弱陛下何所資用而一旦如此無乃欲除疾而更深之耶禍殆不測宜見重詳帝乃出懷中板令投地曰行之決矣正使死何所恨況不必死耶於是入白太后沉業奔走告昭昭爲之備髦遂帥僮僕數百鼓譟而出昭弟屯騎校尉佃入遇見髦於東止車門左右呵之佃衆奔走中護軍賈充又逆髦

戰於南闕下髦自用劔揮衆欲退太子舍人
成濟問充曰事急矣當云何充曰畜養汝等

正謂今日今日之事無所問矣濟卽前刺髦

刃出於背

已上又見世說方正簞汪引一且

詳乃出上無帝字文王聞之大驚自投於地

無畜養汝等八字曰天下其謂我何太傅孚奔往枕帝股而哭

哀甚曰殺陛下者臣之罪也丁卯葬高貴鄉

公於洛陽西北三十里瀍

厚作

澗之濱下車

數乘不設旌旄百姓相聚而觀之曰是前日

所殺天子也或掩面而泣悲不自勝

魏志高貴鄉公

紀注引無自曹芳事後至老弱而已
字曹髦作帝已下凡髦字俱作帝久矣上有
爲日二字奔走告昭昭爲之備二昭字俱作
文王昭弟作文王弟御覽九十四引同魏
志注久矣上無爲日二字無畜養汝等八字
無丁卯二字灑澗作屈澗又五百五十四引
司馬師葬曹髦於洛陽至或掩面而泣灑亦
作屈案師字誤當作昭

郭后

初甄后之誅由郭后之寵及殯令被髮覆面
以糠塞口遂立郭后使養明帝帝知之心常
懷忿數泣問甄后死狀郭后曰先帝自殺何

以責問我且汝爲人子可追讐死父爲前母

枉殺後母耶明帝怒遂逼殺之勅殯者使如

甄后故事

魏志后妃傳注御覽四百九十二又八百五十四引甄后之誅由

郭后之寵及殯令以糠塞口後明帝逼殺郭后使殯如后

曹爽

是年吳將朱然入柁中斬獲數千柁中民吏
萬餘家渡沔司馬宣王謂曹爽曰若便令還
必復致寇宜權留之爽曰今不修守沔南留
民沔北非長策也宣王曰不然凡物置之安

地則安危地則危故兵書曰成敗形也安危
勢也形勢御衆之要不可不審設令賊二萬
人斷沔水三萬人與沔南諸軍相持萬人陸
鈔祖中君將何以救之爽不聽卒令還然後
襲被之有句疑袁淮言於爽曰吳楚之民脆弱
寡能英才大賢不出其土比技量力不足與
中國相抗然自上世以來常爲中國患者蓋
以江漢爲池舟楫爲用利則陸鈔不利則入
水水攻之道遠中國之長技無所用之也孫

權自數十年來大畋江北繕治甲兵精其守禦數出盜竊敢遠其水陸次平土此中國所願聞也夫用兵者貴以飽待飢以逸擊勞師不欲久行不欲遠守少則固力專則強當今宜捐淮漢以南退却避之若賊能入居中央來侵邊境則隨其所短中國之長技得用矣若不敢來則邊境得安無鈔盜之憂矣使我國富兵彊政修民一陵其國不足爲遠矣今襄陽孤在漢南循漢而上則斷而不通一戰

而勝則不攻而自服故置之無益於國亡之
不足爲辱自江夏已東淮南諸郡三后以來
其所亡幾何非以近賊疆界易鈔掠之故哉
若從之淮北遠絕其間則民人安業何鳴吠
之驚乎遂不徙

魏志齊王芳傳注

司馬宣王謂夏侯玄曰春秋責大德重背武
皇帝再入漢中幾至大敗君所知也今興平
路勢至險蜀已先徼若進不獲戰退見徼絕
覆軍必矣將何以任其責玄懼言於爽引軍

退費禕進兵據三嶺以截爽爽爭險苦戰
乃得過所發牛馬運轉者死失畧盡羌胡怨
嘆而關右悉虛耗矣

魏志曹爽傳注

安定皇甫謐以九年冬夢至洛陽自廟出見
車騎甚衆以物呈廟云誅大將軍曹爽寤而
告甚邑人邑人曰君欲作曹人之夢乎朝無
公孫強如何且爽兄弟典重兵又權尙書事
誰敢謀之謐曰爽無叔振鐸之請苟失天機
則離矣何恃於強昔漢人閭顯倚母后之尊

權國威命可謂至重矣闔人十九人旦戶之況爽兄弟乎

魏志同上

蔣濟

公孫淵聞魏將來討復稱臣於孫權乞兵自救帝問濟孫權其救遼東乎濟曰彼知官備以固利不可得深入則非力所能淺入則勞而無獲權雖子弟在危猶將不動況異域之人兼以往者之辱乎今所以外揚此聲者譎其行人疑於我我之不克冀折後事已耳然

沓渚之間去淵尚遠若大軍相持不速決則
權之淺規或能輕兵掩襲未可測也

魏志蔣
濟傳注

王凌

凌愚謀以帝幼制於疆臣不堪爲主楚王長
而才欲迎立之以興曹氏凌使人告廣廣曰
凡舉大事應本人情今曹爽以驕奢失民何
平叔虛而不治丁畢桓鄧雖並有宿望皆專
競於世加變易朝典政令數改所存雖高而
事不下接民習於舊衆莫之從故雖權傾四

海聲震天下同日斬戮名士減半而百姓安
之莫或之哀失民故也今懿情雖難量事未
有逆而擢用賢能廣樹聲色修先朝之政令
副衆心之所求爽之所以爲惡者彼莫不改
夙夜匪懈以恤民爲先父子兄弟並握兵要
未易亡也凌不從

魏志王凌傳注愚謂令狐

諸葛誕

蔣班焦彝言於諸葛誕曰朱異等以大衆來
而不能進孫綝殺異而歸江東外以發兵爲

名而內寔坐須成敗其歸可見矣今宜及衆
心尙固士卒思用并力決死攻其一面雖不
能盡克猶可有全者文欽曰江東乘戰勝之
威久矣未有難北方者也況公今舉十餘萬
之衆內附而欽與全端等皆同居死地父兄
子弟盡在江表就孫綝不欲主上及其親戚
豈肯聽乎且中國無歲無事軍民並疲今守
我一年勢力日困異圖生心變故將起以往
準今可計日而望也班爨固勸之欽怒而誕

欲殺班二人懼且知誕之必敗也十一月乃

相攜而降

魏志諸葛誕傳注

文欽曰蔣班焦彝謂我不能出而走全端全
憚又率衆逆降此敵無備之時也可以戰矣
誕及唐咨皆以爲然遂共悉衆共攻

魏志同上

司馬景王

初孫權築東興堤以遏巢湖後征淮南壞不
復修是歲諸葛恪率軍更於堤左右結山挾
築兩城使全端留畧守之引軍而退諸葛誕

言於司馬景王曰致人而不致於人者此之謂也今因其內侵使文舒逼江陵仲恭向武昌以羈吳之上流然後簡精卒攻兩城比救至可大獲也景王從之

魏志齊王芳紀注

母邱儉王昶聞東軍敗各燒屯走朝議欲貶黜諸將景王曰我不聽公休以至於此此我過也諸將何罪悉原之時司馬文王爲監軍統諸軍唯削文王爵而已是歲雍州刺史陳泰求勅并州並力討恪景王從之未集而雁

門新興二郡以爲將遠役遂驚反景王又謝
朝士曰此我過也非玄伯之責於是魏人愧
悅人思其報

魏志同上

是時姜維亦出圍狄道司馬景王問虞松曰
今東西有事二方皆急而諸將意沮若之何
松曰昔周亞夫堅壁昌邑而吳楚自敗事有
似弱而強或似強而弱不可不察也今恪悉
其銳衆足以肆暴而坐守新城欲以致一戰
耳若攻城不拔請戰不得師老衆疲勢將自

走諸將之不徑進乃公之利也姜維有重兵而縣軍應恪投食我麥非深根之寇也且謂我並力於東西方必虛是以徑進今若使關中諸軍倍道急赴出其不意殆將走矣景王曰善乃使郭淮陳泰悉關中之衆解狄道之圍勅母邱儉等案兵自守以新城委吳姜維聞淮進兵軍食少乃退屯隴西界

魏志同上

叡固勸景王行景王未從叡重言曰淮楚兵勁而儉等負力遠鬪其鋒未易當也若諸將

戰有利鈍大勢一失則公事敗矣是時景王
新割目瘤創甚聞故言蹶然而起曰我請與
疾而東

魏志傳故傳注

司馬文王

晉公既進爵爲王太尉王祥司徒何曾司空
荀顗並詣王顗曰相王尊重何侯與一朝之
臣皆已盡敬今日便當相率而拜無所疑也
祥曰相國位勢誠爲尊貴然要是魏之宰相
吾等魏之三公王公相去一階而已班列大

同安有天子三公可輒拜人者損魏朝之望
虧晉王之德君子愛人以禮吾不爲也及入

顗遂拜而祥獨長揖王謂祥曰今日然後知

君見顧之重

魏志陳留王紀注

御覽五百

顗曰作顗謂祥曰何侯下無與一朝之臣五
字皆已作既已王謂祥曰作帝曰帝字誤然
後作方字重下有矣字世說簡傲篇注引
文王進爵爲王司徒何曾與朝臣皆盡禮唯
王祥獨長揖不拜

晉文王與皓書曰聖人稱有君臣然後有上

下禮義是故大必字小小必事大然後上下

安服羣生獲所逮至末塗純德旣毀勦民之
命以爭強於天下違逆順之至理則仁者弗
由也方今主上聖明覆幬無外僕備位宰輔
屬當國重唯華夏乖殊方隅圯裂六十餘載
金革亟動無年不戰暴骸喪元困悴罔定每
用悼心坐以待旦將欲止戈興仁爲百姓請
命故分命偏師平定蜀漢役未經年全軍獨
克於時猛將謀夫朝臣庶士咸以奉天時之
宜就旣征之軍藉吞敵之勢宜遂同旗東指

以臨吳境舟師泛江順流而下陸軍南轅取
徑四郡兼成都之械漕巴漢之粟然後以中
軍整旅二方雲會未及浹辰便使江表底平
南夏順軌然國朝深惟伐蜀之舉雖有靜難
之功亦悼蜀民獨罹其害戰於綿竹者自元
帥以下並受斬戮伏尸蔽地血流丹野一之
於前猶追恨不忍況重之於後乎是故旋師
按甲思與南邦共全百姓之命夫料力忖勢
度資量險遠考古昔廢興之理近鑒西蜀安

危之效隆德保祚去危卽順屈已以寧四海
者仁哲之高致也履危偷安隕德覆祚而不
稱於後世者非智者之所居也今朝廷遣徐
紹■或獻書喻懷若書御於前必少留意回
慮革算結歡弭兵其爲一家惠矜吳會施及
中土豈不泰哉此昭心之大願也敢不承受
若不獲命則普天率土期於大同雖重干戈
固不獲已也

吳志孫皓傳注

鄧艾

樊建爲給事中晉武帝問諸葛亮之治國建
對曰聞惡必改而不矜過賞罰之信足感神
明帝曰善哉使我得此人以自輔豈有今日
之勞乎建稽首曰臣竊聞天下之論皆謂鄧
艾見枉陛下知而不理此豈馬唐之所謂雖
得頗牧而不能用者乎帝笑曰吾方欲明之
卿起我意於是發詔治艾焉

蜀志諸葛亮傳
注羣書治要

二十七蜀志

鍾會

初夏侯霸降蜀姜維問之曰司馬懿旣得彼
政當復有征伐之志不霸曰彼方營立家門
未遑外事有鍾士季者其人雖少終爲吳蜀
之憂然非常之人亦不能用也後十五年而
會果滅蜀

魏志鍾會傳注

鍾毓

文王嘉其忠亮笑答毓曰若如卿言必不以
及宗矣

魏志鍾會傳注

向雄

習鑿齒漢晉春秋

文王聞鍾會功曹之收葬會也召而責之曰
往者王經之死卿哭於東市而我不問今鍾
會躬爲叛逆而又輒收葬若復相容其如王
法何雄曰昔先王掩骼埋胔仁流朽骨當時
豈先卜其功罪而後收葬哉今王誅旣加於
法已備雄感義收葬教亦無關法立於上教
宏於下以此訓物雄曰可矣何必使雄背死
違生以立於時殿下讐對枯骨捐之中野百
歲之後爲臧獲所笑豈仁賢所掩哉王悅與

宴談而遣之

魏志鍾會傳注

羣書治要二

有向雄二字

御覽四百二十引文王誅鍾

會為功曹向雄收葬王召而責之雄曰昔先王掩骨埋齒至末教亦作於教誓對作仇忿豈仁下衍人字

衛瓘

初艾之下江由也以續不進欲斬既而捨之及瓘遣續謂曰可以報江由之辱矣杜預言於衆曰伯玉其不免乎身為名士位望已高既無德音又不御下以正是小人而乘君子之器將何以堪其責乎瓘聞之候駕而謝魏志

鄧艾傳注

嵇康 呂安

正元二年司馬文王反自樂嘉殺嵇康呂安

魏志王粲傳注

王褒

褒與濟南劉兆俱以不仕顯名褒以父爲文

王所濫殺終身不應徵聘未嘗向西坐以示

不臣於晉也

魏志王脩傳注

御覽三百九

未嘗西向坐示不臣也

王褒父儀爲文帝所殺

孫策

孫策之始得朗也使張昭私問朗朗誓不屈策忿而不敢害也留置曲阿建安三年太祖表徵朗策遣之太祖問曰孫策何以得至此耶朗曰策勇冠一世有雋才大志張子布民之望也北面而相之周公瑾江淮之傑攘臂而爲其將謀而有成所規不細終爲天下大賊非徒狗盜而已

魏志王朗傳注

孫權

公孫淵自立稱紹漢元年聞魏人將討復稱
臣於吳乞兵北伐以自救吳人欲戮其使羊
衛曰不可是肆匹夫之怒而損霸王之計也
不如因而厚之遣奇兵潛往以要其成若魏
伐淵不克而我軍遠赴是恩結遐夷義蓋萬
里若兵連不解首尾離隔則我虜其傍郡驅
畧而歸亦足以致天之罰報雪曩事矣權曰
善乃勒兵大出謂淵使曰請俟後問當從簡
書必與弟同休戚共存亡雖隕於中原吾所

甘心也又曰司馬懿所向無前深爲弟憂也
魏志公孫度傳注

零陵太守殷杜言於權曰今天棄曹氏喪誅
累見虎爭之際而幼童莅事陛下身自御戎
取亂侮亡宜滌荆揚之地舉強羸之數使強
者執戟羸者轉運西命益州軍於隴右授諸
葛瑾朱然大衆指事襄陽陸遜朱桓別征壽
春大駕入淮揚歷書徐襄陽壽春困於受敵
長安以西務對蜀軍許洛之衆勢必分離特

角瓦解民必內應將帥對向或失便益一軍
敗績則三軍離心便當秣馬脂車陵陷城邑
乘勝逐北以定華夏若不悉軍動衆循前輕
舉則不足大用易於屢退民疲威消時往力
竭非出兵之策也權弗能用之

吳志孫權傳注

孫皓

初望氣者云荊州有王氣被揚州而建業宮
不利故皓徙武昌遣使者發民掘荊州界大
臣名家冢與山岡連者以厭之旣聞但反自

以爲徙土得計也使數百人鼓譟入建業殺
但晏子云天子使荊州兵來破揚州賊以厭
前氣

吳志孫皓傳注

先是吳有說讖者曰吳之敗兵起南裔亡吳
者公孫也皓聞之文武職位至於卒伍有姓
公孫者皆徙於廣州不令停江邊及聞馬反
大懼曰此天下亡也

吳志同上

魯肅

呂範勸留備肅曰不可將軍雖神武命世然

曹公威力實重初臨荊州恩信未洽宜以借
備使安撫之多操之敵而爲樹黨計之上也
權卽從之

吳志魯肅傳注

薛琬

孫休時琬爲五官中郎將遣至蜀求馬及還
休問蜀政得失對曰主闇而不知其過臣下
容身以求免罪入其朝不聞正言經其野民
皆菜色臣聞燕雀處堂子母相樂自以爲安
也突洪棟焚而燕雀怡然不知禍之將及其

是之謂乎

吳志薛綜傳注

陸抗

羊祜旣歸增修德信以懷吳人陸抗每告其
邊戍曰彼專爲德我專爲暴是不戰而自服
也各保分界無求細益而已於是吳晉之間
餘糧棲畝而不犯牛馬逸而入境可宣告而
行也
上獵吳獲晉人先傷者皆送而相還
抗嘗疾求藥於祜祜以合成與之曰此上藥
也近始自作未及服以君疾急故相致抗得

而服之諸將或諫抗不答孫皓聞二境交和以詰於抗抗曰夫一邑一鄉不可以無信義之人而況大國乎臣不如是正足以彰其德於祐無傷也或以祐抗爲失臣節兩譏之吳志陸氏傳注白帖務德勝引羊祐還鎮寧涉德信至無求細益而已每告其邊戍無每其二字細益作小益而已作也

楊稷 毛炅

初霍弋遣楊稷毛炅等戍與之誓曰若賊圍城未百日而降者家屬誅若過百日而城

者刺史受其罪稷等曰未滿而糧盡乞降尤
璜璜不許而給糧使守吳人並諫璜曰霍弋
已死無能來者可須其糧盡然後乃受使彼
來無罪而我取有義內訓吾民外懷鄰國不
亦可乎稷吳糧盡救不至乃納之吳志孫皓傳注
帖降引霍弋謫作霍光等成作屯交趾無與
之誓三字受其罪下作及吳陶璜圖之無稷
等二字而給糧下無使守至稷吳四十九字
乃納之作乃受降末有與荀吳事正類也

桓爰

龔魏尚書令階之弟

吳志孫綝傳注
俱三國志注

己上

鍾離意

鍾離意相魯見仲尼廟頽毀會諸生於廟中慨然嘆曰蔽芾甘棠勿翦勿伐況見聖人廟乎遂躬留治之周觀輿服之在焉自仲尼以來莫之開也意發視之得古文策書曰亂吾書董仲舒治吾堂鍾離意壁有七張伯盜一意尋案未了而卒張伯者治中庭治地得六壁上之意曰此有七何以不遂伯懼探壁懷

中魯咸以爲神續漢書郡國志注又後漢
子宅注引漢春秋曰帝時升廟立羣臣中庭
北面皆再拜帝進爵而後坐案此條不知是
孔衍漢魏春秋不知是習鑿齒漢晉春秋姑
附於此

王經

初曹髦將自討司馬昭經諫曰昔魯昭不忍
季氏敗走失國爲天下笑今權在其門久矣
朝廷四方皆爲之致死不顧順逆之理非一
日也且宿衛空闕寸刃無有陛下何所資用
而一旦如此無乃欲除疾而更深之耶髦不

聽後殺經并及其母將死垂泣謝母母顏色
不變笑而謂曰人誰不死往所以止汝者恐
不得其所也以此并命何恨之有世說賢媛
篇注
志夏侯尚傳注引經被收辭母母顏色不變
至末謂作應之有下有哉字

陳泰

曹髦之薨司馬昭聞之自投於地曰天下謂
我何於是召百官議其事昭垂涕問陳泰曰
何以居我泰曰公光輔數世功蓋天下謂當
並迹古人垂美於後一旦有殺君之事不

惜乎速斬賈充猶可以自明也昭曰公間不可得殺也卿更思餘計泰厲聲曰意唯有進於此事耳餘無足委者也歸而自殺

世說方正篇注

向雄

雄字茂伯河內人

世說方正篇注

羊祜

初羊祜以軍法欲斬王戎夷甫又忿祜言其必敗不相貴重天下爲之語曰二王當朝人莫敢稱羊公之有德

世說識鑒篇注

王敦

初王夷甫言東海王越轉王敦爲荊州涪初
爲太傅長史言於太傅曰王處仲蜂目已露
但豺聲未發今樹之江外肆其豪彊之心是
賊之也世說識鑒篇注 御覽三百八十八
引王敦爲荊州刺史潘涪曰處仲蜂
目已露至末涪謫作濤仲謫作沖賊之作見
賊

華軼

劉琨知軼必敗謂其自取之也世說識鑒篇

庾翼

翼風儀美劭才能豐贍少有經緯大畧及繼
兄亮居方州之任有匡維內外掃蕩羣凶之
志是時杜乂殷浩諸人盛名冠世翼未之貴
也常曰此輩宜束之高閣俟天下清定然後
議其所任耳其意氣如此唯與桓溫友善相
期以寧濟宇宙之事初翼輒發所部奴及車
馬數萬率大軍入沔將謀伐狄遂次於襄陽
世說豪爽篇注 已上世說注

漢桓帝

桓帝幸樊城百姓莫不觀之有一父老獨耕
不輟議郎張溫使問焉父笑而不答溫因與
之言問其姓名不告而去水經沔水注藝
笑作嘯御覽三百九十二引同藝文
帖肅引同藝文

王衍 樂廣

王夷甫樂廣俱以宅心事外名重於時故天
下之言風流者稱王樂焉文選任彦升王文
憲集序注又劉先
生夫人墓誌注又王仲寶褚淵碑文注引俱
名重於時四字

劉毅

世祖問毅曰卿以吾可方漢何帝對曰可方桓靈世祖曰吾雖德不及古人猶克已爲治又平吳會混一天下方之桓靈其已甚乎對曰桓靈賣官錢入官庫陛下賣官錢入私門以此言之乃殆不如桓靈也毅答已帝大笑曰桓靈之朝不聞此言今有直臣故不同乎散騎常侍鄒湛進曰世說以陛下比漢文帝人心猶多不同昔馮唐答文帝曰不能用頗牧而文帝怒今劉毅言犯順而陛下樂以此

相校聖德乃過之也帝曰我平天下而不封
禪焚雉頭行布衣禮今於小事何見褒之甚
耶湛曰聖詔所及皆可豫先算計以長短相
推慕名者能力行爲之至如向詔非明恕內
充苞之德度不可爲也臣聞猛獸在田荷戈
而出凡人能之蜂蠆起於懷袖勇夫爲之驚
駭非虎弱蜂蠆強也倉卒出於意外故也夫
君臣有自然之尊卑辭語有自然之逆順向
劉毅始言臣等莫不變色易容而仰視陛下

者陛下發不世之詔出思慮之外臣之喜慶

不亦宜乎

羣書治要卷第三十引習鑿齒陽秋自毅答已起其上一世祖問毅曰

至不如相靈也乃所載晉書正文案其文義當亦漢晉春秋所有故備錄之以足語意

晉愍帝

愍帝在長安爲劉粲所攻糧盡太倉有麴數

十餅屑之爲粥以供奉帝麴屑盡遂降

書鈔一百

四十七又二十一引麴屑爲粥

御覽八百

胡威

晉武帝謂胡威曰卿清孰與父清對曰臣不

如父帝曰以何爲不如對曰臣父清恐人知
臣清唯恐人不知是不如父也

書鈔三十八
已上書鈔

陳羣

初陳羣爲吏部尙書制九格登用皆由於中
正考之簿世然後授任

初學記十二

殿

景福殿聽政殿

初學記二十四引漢晉春秋
有景福殿聽政殿已上初

魏明帝

青龍三年七月曹叡崇華殿災時郡國有龍
九見故改曰九龍殿藝文九十八

漢明帝

明帝勤於吏事苛察踰甚或於殿前鞭殺尙
書郎御覽六百四十九

漢質帝

帝初年幼小聞梁冀專權於天下每朝出輒
目之曰此跋扈將軍冀聞而大懼遂陰行鴆
毒始病呼太尉李固入固前問病帝曰食煮

餅令腹中悶得水尙可活冀曰不可語未絕而崩

御覽九十二

漢桓帝

梁皇后崩桓帝獨呼小黃門唐衡至北戶如廁問左右梁冀不相得者爲誰衡對曰單超左悺前詣河南尹不疑禮敬小簡不疑收其兄弟送洛陽獄於是帝入室定謀齧超臂出血以爲盟乃誅梁冀

御覽四百八十

漢獻帝

獻帝都許守位而已宿衛近侍莫非曹氏黨
舊恩戚議郎趙彥嘗爲帝陳言時策曹操惡
而殺之其餘內外多見誅操後以事入見殿
中帝不任其忿因曰君能相輔則厚不爾幸
垂恩相捨操失色俛仰求出舊儀三公輔兵
入廟令虎賁執刃挾之操顧左右汗流洽背
自後不敢復朝請

御覽九十二

羅獻

初魏軍始入蜀劉禪分二千人付羅獻留守

吳聞蜀敗遂起兵遣盛憲等水陸並到說獻以合從之計獻謂諸將曰今據孤城百姓無主吳人因釁公敢西過宜一決戰以示衆心遂銜枚夜出擊破憲

御覽三百五十七

曹爽

曹芳謁曹叡墓於大石山曹爽兄弟皆從於是司馬懿閉四城遂與太尉蔣濟俱屯洛水南浮橋奏罷爽兄弟不知所爲芳還宿伊水南發屯田數千人樹鹿角爲營

御覽三百三十七

晉武帝

武帝改營太廟南致荆山之木西採華山之石鑄銅柱十二塗以黃金鏤以百物填以丹青綴以珠玉以麗之也

御覽五百三十一

晉懷帝

懷帝陷於平陽劉聰加帝開府儀同三司會稽郡公引帝入醢謂帝曰卿爲豫章王時朕與王武子俱造卿武子稱朕於卿卿言聞名久矣卿以所作樂府文示朕曰劉君聞君善

詞賦試爲看也朕與武子俱爲盛德頌卿稱
善者久之又引朕射於皇堂朕得十二等卿
與武子俱得九等卿又贈朕柘弓銀硯卿頗
憶否帝曰安敢忘之恨爾日不得早識龍顏
聰曰卿家骨肉何相殘之甚帝曰此殆非人
事皇天意也大漢將興應乾受祿故爲陛下
白相驅耳且臣家若能奉武皇帝之業九族
敦睦陛下何由得之聰甚有喜色御覽五百八十八引
晉春秋案諸書引孫盛晉陽秋亦有作晉春秋者故兩存之

齊王問

齊王問之方盛也有婦人詣大司馬門求寄
產吏詰之婦人曰我截齊罷便去耳有識者
聞而惡其言

御覽三百七十一

傳玄

初文帝之崩也羊祜謂傳玄曰三年之喪雖
貴遂服自天子達而漢文除之毀禮傷義當
以爲嘆今上天縱至孝有曾閔之性雖奪其
服而實行喪禮喪禮行除服何爲耶若因此

革魏之薄而興先王之法以敦厚風俗垂之
百代不亦美乎玄曰漢文以來世乃淺薄不
能行國君之喪因而除之數百年一旦復古
恐難行也祐曰就不能使天下如禮且使主
上遂服不猶善乎玄曰若主上不除而下除
此爲但有父子無君臣三綱之道虧矣君子
曰傅玄知無君臣之傷教而不知廉無父子
之爲重豈不蔽惑哉漢廢君臣之喪不降父
子之服故四海黎庶莫不盡於其心三綱之

道二服恒用於私室而王者獨盡廢之豈所以孝治天下乎詩云猶之未遠其傳玄之謂也

御覽五百四十七至虧矣

書鈔九十三陳補引

陳蹇

陳蹇兄丕有名於世與夏侯玄親交玄拜其母蹇時爲中領軍聞玄會於其家悅而歸旣入戶玄曰相與未至於此蹇當戶立良久曰如君言乃趨而出意氣自若玄大以此知之

御覽四百九十八

補遺

漢章帝

闕里者仲尼之故宅也在魯城中帝升廟西
而羣臣中庭北面皆再拜帝進爵而後坐續漢書祭祀志注